

LA USC DI LADINS - MERCOLEDÌ 23 DICEMBRE 2020

COMUNANZA

Tegnon adum e vardon inant con serenità

L Consei de Procura del Comun General é vejìn a duta comunanza de Fascia te chest temp de Nadèl senester, che pel ne didèr a troèr endò i valores più emportanc

Te chest temp senester che sion dò a viver, speton con fiduzia l messaje lumenous del Babin che nasc.

L Nadèl, con sie valor spiritual fon te la tradizion de Fascia, ne porta n segn de speranza, l ne ricorda i valores de na comunanza cristiana che é te noscia rejjes e te chest tant cert l ne fèsc pissèr amò de più a nesc stii de vita e al besegn de vardèr a la realtà, a la sobrietà e a la solidarietà.

L'atmostfera da Nadèl ne fèsc sentir amò più vejins a noscia jent.

Nosc prum pensier va a duc chi che à perdù zachei de familia, a chi che personalmenter o te sia majon i padesc per problemes de sanità e a chi che padesc per na condizion economica malsegura.

Volon ge sporjer noscia solidarietà a duc, a la families, a la jent che laora, ai imprenditores.

Volon ge palesèr nosc develpai fort dal cher a duc chi che se à metù a la leta per didèr la comunanza ti momenc senestres, te la sanità e tel sozièl, te la protezion zivila, te la scola, te la parochies, te la cèsa de paussa, te la boteighes e i servijes essenzièi, te la sociazions e te la families.

Ti momenc senestres la jent da mont, che à vivù de spes tempes grieves te la storia, l'à semper sapù responer fajan crescer l spirit de condivijion e de comunità. Ence ades la jent de Fascia cogn esser forta e tegnir adum, coche l'à desmostrà te n muie de autra ocasions.

Duc nos vivon de raporc e demò chisc raporc, l fèr pèrt de na comu-



I componenc del Consei de Procura del Comun General de Fascia. Da man cencia Riccardo Donei, Mirella Florian, Amedeo Valentini, l procurador Giuseppe Detomas, Carlo Ganz, Martina Pederiva, l vizeprocurador Renato Nazario Micheluzzi. Mencia l Consei de Procura Giorgio Dorich.

nanza, l tegnir adum, pel ne didèr a passèr via i problemes. Saer de poder fèr cont sun chest ne dèsc speranza e fiduzia de poder jir encontra a n davegnir mior.

Nosc augurie maor l'è che la comunanza sie bona de troèr i elemenc che la tegn ensema, de alimentèr l volontariat e l sistem de rei sozièla e de solidarietà e che duta

la istituzions les sie apede e les sapie semper interpretèr delvers chest sens de solidarietà e de unità, a na vida da poder ge fèr front duc ensema a chest temp senester con spirit più seren e mingol de otimismo.

Chest l'è l'obietif del Comun General de Fascia per i egn che vegn. Chest l'è nosc empegn ence envers la neva generazions.

Con l'augurie che l Babin l ge porte sanità, pèsc e legreza a duta la jent de Fascia e che se posse al più prest vegnir fora da chest temp malsegur e troèr endò la serenità e l met per poder operèr desche dant, ogneun te sie setor.

L Consei de Procura del Comun General de Fascia